

Dobēlts lietovis

Tuoks īr tēkros žemaitis. Ons sopront vēsuokēs tarmēs ē pats muok vēsēp pasērokoutē. Vuo kētēms tēp tēkrā ka neēšein. Juk musintās ne be rēkala universiteta dabartēnēs lietoviu kalbuos diestītuos Pupkis lioub sakītē, ka žemaitē ne tik pasiotosē gerā ēštar vēsuokius žuodius, bet ē truopnē kērcioun.

Tās čiesās, ka dar tebibovau stodētē, pasētruopējē čīstā joukings notēkēms. Ka vēina dēina ciela kopēta tuo patēis universiteta kēimelie laukiem paskaituos, pradiējē lašnuotē. Mes solinduom po stuogo, vuo kelē vaikē kap žousēnā stripinējē laukē. Aš anēms ē sakau: „Kuo če šlapēnaties – akšēnkēt pas mumis.“ Tou tarpo pruo šali ējēs diestītuos ka pradiējē žvēngtē. Vuo anam ēš paskuos – ē vēsē kētē. Ons tēik tepasākē: „No to, žemaitē...“

Ka dabā pamēslējo, jaunīstēs metās kap so čiderstvo vēsas mona draugēs bova ne žemaitēs, bet kažkāp sosērokavuom, nuors aš kētēp lēižovē nesokēniejau. Tuoki Jedzelē ēš Kaišiaduoriu arba Juolanta ēš Juonēškē grīnā vēskou soprata ēr kelis mona tarmies žuodius ēšmuoka. Biškieli keistesnē bova Regina ēš Prienu. Ka vedvē lioubau kou nuors rokoutēis, patiemējau, ka ana kartās kuolējēs. Negaliedama ēštorietē, parspiejau. Vuo ana tik ēšsprugēna sava veizuolus ē stuoję aiškintēis, ka nesikuoliuo, vuo gražē rokoujēs. Aš anou notājējau, ka ne tou toriejau galvuo. Vuo ont galū gāla reikiējē vēskou parpasakuotē, kap ana sakē, valog bēndrēnēs kalbuos ē neskobont.

Vuo jau so tuokē Danutelē ēš Kelmēs rajuona lioubau prēsējouktē lig ašaru: ana ēš mona kalbuos, aš – ēš anuos. Mon dēdlē keistā atruodē, bet žiaurē patēka tuokēi anuos pasakīmā: „Vēsē bernā īr latrā; vīni jukā; gražē gīt.“

Ēš mūsēškēs tarmies dā ē dabarčiou tebdīvuojēs vēina muokītuoję. Ka priš keliuolēka mētu ana so tievās ēš kēta rajuona pērma karta somēslējē atvažioutē i Skouda apsēveizietē, pakeliou ožsoka i Muosiedi. Berailiniedamē puo miestāli, nebrada, koriou berēk ēšvažioutē. Ka sotēkta žmuogēlē pasēklausē, ni tēik nieka nebsoprata. Ons so ronka paruodēs ēr pasakēs: „Biški pavažiousēt ē toukart – kels i Skouda.“ Anēi tik sosēžvalgē ēšsēgondē, ka kažkas so kažkou kels, bet kor dingsi, ka esi atažjavēs – rēk pasēiktē keliuonēs tēksla. Vuo ka atvažiava i Skouda, miests patēka, ēr muokītuoję lig šiulē pasēlēka. Dabā ēr pati rokoujēs beveik kāp mes.